

KONTROL MOZIOA

“EUROPAKO HIZKUNTZEN MAPA” EZ GORDETZEA dela-eta

Amaia Almirall Lopez de Luzuriaga EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du Udalbatzan azter dadin. Mozioa 2017ko martxoaren 20an Pertsonentzako Zerbitzuetako Batzordean aztertutako “Europako Hizkuntzen Mapa” ez gordetzeari buruzko interpelazioaren ondorioa da.

JUSTIFIKAZIOA

“Europako Hizkuntzen Mapa” Donostia 2016dsseu Fundazioak eta Bagera elkarteak sustatuko “Euskarriak” proiektuaren pieza bat da Nestor Basterretxea plazan, Tabakalera ondoan, dagoena; Manex Izagirre eta Iñaki Rifaterra sortzaileen lana da eta Donostian hitz egiten diren Europako jatorrizko 91 hizkuntza jasotzen ditu.

Nabarmendu behar da oso harrera ona izan duela donostiarren artean, baita bisitarien artean ere. Egitasmoaren helburua zen, euskarri berezien bidez, herritarren arreta deitu eta harritzea. Egurrezko mapa hau guztiz bisuala izateaz gain, mezu argigarri batek osatzen du: “Hizkuntza txikiek mundua handitzen dute”. Euskara hizkuntza txikia da, baina, dudarik gabe, mundua handitzen du; Donostia bera handitzen du, mapa horretan kokatzen lagundu baitu. Babestu behar diren hizkuntza txikien mapa da. Eta egitasmoaren helburua lortu du, herritarren arreta jaso baitu, donostiarrena, zein bisitariena.

Duela gutxi Udal Gobernuak mapa kentzeko asmoa zuela zabaldu zen, eta jakitearekin batera, mapa gordetzeko eskaerak ere zabaldu ziren. Jarrita egon den denboran mapak izaera berezia hartu du eta ikur bilakatu da: euskara eta hizkuntza aniztasunaren defentsarako ikurra. Ez da ulertzen mapa hortik kentzea, eta ez da ulertzen hizkuntza gutxituen mapa kentzea. Are eta gehiago, ez da ulertzen alternatibarik gabe egitea.

Adituen zein herritarren artean izandako harrera ona ikusita, honelako lanei segida ematea baztertu baino kontsideratzeko unean gaudela argi dago. Beraz, “Europako Hizkuntzen Mapa” lanari segida eman ahal izatea ez da baztertu

beharrekoa. Izan ere, legatua erabakitzeke dagoenez, mapa erretiratzeko erabaki irmoa ulertezina da, bere egoerari dagozkion zaintzak pentsatu eta berau gordetzeko egon daitezkeen alternatibak bilatu beharrean.


2016ko legatu moduan “Europako Hizkuntzen Mapa” delakoa geroan ere ikusgai gera dadin aztertzeko eskaera, beraz, beharrezkoa da, etorkizuneko Donostiak eta donostiarrek ezagutzeko aukera izan dezaten.

Donostian asmatua eta sortua, Donostiako errealitatea jasotzen duena (Donostian hitz egiten diren Europako hizkuntzak), Donostian ikusgai egoterakoan balorea hartu duena, Donostiako euskalgintza eragilerik erreferenteenetako batek bultzatua eta Donostia Europako Kultura Hiriburutzak izan denean. Elementu guzti horiek presente, ulertezina da 2016 Hiriburutzako, Kulturako eta Euskarako zinegotzi ordezkariari entzutea Udalak ez duela zertan mapa bere egin.

Horiek horrela, hauxe da behean sinatzen duen zinegotziak aurkeztutako KONTROL MOZIOA:

- Udalbatzak hertsiki eskatzen dio Udal Gobernuari gaur egun Nestor Basterretxea plazan dagoen “Europako Hizkuntzen Mapa” delakoa geroan ere ikusgai gera dadin, berau gordetzeko beharrezko ekintzak gauza ditzan eta baliabide egokiak eskura jar ditzan.

Donostian, 2017ko martxoaren 24an



Amaia Almirall Lopez de Luzuriaga
EH Bildu udal taldeko zinegotzia